

1811

丛书 3



芳林宝笈存

游芳英
卿石麟
合著

《双清诗词》丛书之三

邵阳诗社编

芳林室詩存

卿石麟
游芳英
合著

《双清诗词》丛书之三

湖南省邵阳市诗社编

审 编 马少侨
责任编辑 谢道锡
封面题字 樊德纯
封面摄影 谢正之

《双清诗词》丛书之三

芳林室诗存

卿石麟游芳英合著

※

邵阳诗社编

(湖南省邵阳市城北路35号 邮政编码: 422000)

邵阳市资江印刷厂印刷

湘邵文准(90)52号

1990年9月第一版第一次印刷

开本: 788×1082 1/32 印张: 5.5 字数: 100000

印数: 1—1000

**与友人话解放前掩护中共新化
地下党领导文琳同志进行革命活动**

腥风血雨满梅山，
革命深知前路艰。
也学孟尝门下客，
鸡鸣长护过函关。

游芳英



卿石麟同志和游芳英同志合影 一九九〇年八月

芳林室诗存序

临风玉树，张京兆笔染春山；出水青莲，谢道蕴诗吟柳絮。抚高山而弹流水，凤伴鸾翔，颂晚红而惜余年，妇随夫唱。人云梁孟姻缘，世间美眷；我道卿游琴瑟，当代新风。读《芳林》之诗篇，斯言可证；数双清之群彦，雅什堪传者也。

吾友卿君石麟，本梅山之望族，继南村、叔绩之高风，亦柳永之门生（卿君与余同受知于湘阴柳公敏泉），得晓风残月之余韵。胸藏兵甲，曾挥大泽乡之长竿；腹贮经纶，发展桑弘羊之学术。悲鹤鸽之羽录，顾影伤怀；嗟苜蓿之槽空，由人唤马。迄至春回大地，探资源而九上南山；喜到眉梢，获荣称而名书红榜。四十年风风雨雨，肝胆弥丹；万余日晷晷勤勤，须眉添白。余事为诗，滚玉盘之珠脆；有言皆史，留汗简之香醇。此书生之本色，亦经世之良才也。其夫人游芳英女史，十三豆蔻，喜弄青梅；百尺松萝，同骑竹马。誓订蒲苇盘石，守素志而坚贞；诗吟荇菜睢鸠，在河洲而酬唱。楼头望柳，郎觅封侯；堂上承欢，妾甘操臼。叔氏孤雏是抚，翼复深深；春晖手线频牵，针缝密密，平莫须有之冤狱，敢捋虎须；写真善美之新歌，轻吹风管。巾帼英雄之气慨，扫眉才子之风华，得兼而有矣。兰闺清侣，有如是乎。

夫诗者，在心为志，发言为诗。故或歌盛世，康衢传击壤之篇；或诉牢愁，东野有不平之什。或名山胜水，收来画

里风光；或思妇劳人，历数胸中块垒。读杜陵《三吏》，唐运堪嗟；诵屈子《九章》，楚风可鉴。而石麟、芳英夫妇者，固矩矱以步嵇康而传广陵绝响；绳绳以效白傅而翻乐府新声也。方其邂逅相思于南国，与子同车；诉缱绻于东风，好花并蒂。羊城鸿爪，白天鹅交颈同栖；西粤萍踪，碧玉簪倚云斜插。南音绮丽，诗有是焉。至若昭陵定宅，静室谈诗。萤光灯暖，追逝水之年华；翰墨香流，创名山之事业。猜经文而茶覆罗衫，易安才博；对凤侣而琴传心曲，司马情深。虽非世外之仙缘，是亦人间之佳偶矣。屈指古今，能有几耶？

乙酉之春，郡君子有诗社之建立，咸推余以掌吟旌。刊梨镌枣，校豕纠鱼，石麟夫妇皆全力肩之，固我社之台柱也。洋洋乎春泛资江之艇，咸饮水浴鸳鸯；飘飘兮秋攀砥柱之矶，共指宾来鸿雁。每赋新章，辄倾四座。虽缀紫以堆朱，不失牡丹颜色；纵淡描而素绘，能传兰蕙风姿。如谓诗中有我，是音律之正宗；须知笔底生花，亦风骚之传统也。卿游之什，浓淡皆宜，旨在斯矣，序云乎哉！

马少侨

一九九〇年十一月于昭陵

读卿石麟学兄暨其夫人游芳英女士近作，喜赋三绝呈教

新化 罗云枢

卅年未识管夫人，丽句清才格调新。
几席顿教春意满，开函犹似获多珍。

江郎自有生花笔，谢女尤饶咏絮才。
懒画蛾眉搜好句，问君几世始修来。

昔序梅轩事已遥，可怜秦火迹全销。
他年若梓同心集，愿索枯肠再续貂。

赠卿石麟同志暨其夫人游芳英同志 新化 罗彦南

见说诗人乐事多，和调琴瑟共吟哦。
何须更羡神仙侣，携手双清好踏歌。

六岭风光大胜前，已教日月换新天。
挥毫共写中兴颂，谱出光华锦绣篇。

一代江山一代诗，风流人物数今时。
画眉旧有生花笔，咏雪新填柳絮词。

赠卿石麟同志暨其夫人游芳英同志 衡南 沈 达

昭陵胜处漫为家，风自清高日自华。
名士心连才妇笔，好将晚节咏黄花。

题画赠卿石麟、游芳英夫妇 湘潭 王扬修（女）

少年壮志欲凌霄，回首东风鬓渐凋。
记得春宵初上月，紫藤花外听吹箫。

答游芳英同志兼呈卿石麟同志

新邵 黄叙

文场鏖战阵堂堂，劲旅交锋笔有光。
壮士蛾眉两不让，诗成三百斗斜阳。

紫鸾翠凤舞明堂，遍体文章五色光。
相顾一鸣齐举翮，风云际会共朝阳。

天赐奇才聚一堂，青衫红袖两生光。
画眉彩笔同飞舞，倾慕如葵总向阳。

卿石麟诗

族兄喧元云由闽浙抗日鏖战来归者，值吉安之役，去路陷敌，株守家园，待时再去，予赋以赠 一九四二年

我愧无才济世危，漫将铁笔扫胸悲。
长歌吴楚千程隔，难写乡园一片思。
谁向沙场寻马革，好循湖海觅羊皮。
中原岂乏风云会，努力擎孤再去时。

登祝融峰

一九四三年

振衣千仞览鸿荒，莽莽神州半战场。
万里烽烟连广汉，千村荆杞痛湖湘。
石填瀛海无精卫，日退戈矛有鲁阳。
攘臂高呼祝融顶，唤醒狮吼震东方。

夜雨（得秋字）

一九四四年

烛剪巴山夜，铃听蜀道愁。
添来一霎雨，便觉十分秋。
旅雁寒惊阵，飞萤浪入楼。
明朝还怅惘，枫叶乱流沟。

芷溪村避难纪怀四首

一九四五年

曾记倭奴肆虐年，举家飘泊芷溪边。
人民城郭哀辽鹤，风雨关河哭杜鹃。

命到危时悬一发，事多重任压双肩。
可怜当道多豺虎，喘息荒村得苟延。

山阿两月苦栖迟，姓字韬藏恐世知。
每叹儿雏疏抚育，为怜亲老欠扶持。
铁蹄蹂躏关山破，弹雨纵横草木衰。
却盼貔貅齐奋勇，快携长剑斩虾夷。

鏖战洋溪咽鼓声，死生指顾浑难稽。
云屯韩信千军集，雾作蚩尤百里迷。
枵腹防饥资罢亚，燃眉急火望云霓。
詎知士卒多骄餒，刁斗声寒景益凄。

扶夷水上凯歌回，风鹤皆兵贼胆摧。
流寓兰成慵作赋，陈情李密顿增哀①。
空囊已让清风管，孤馆还欣明月来。
多谢故人频问信，劫余心事未全灰。

注：①一九四五年五月祖母曾逝世。

寄怀张人鹤同学蜀中

一九四五年

风雨重阳届此时，他乡为客不胜悲。
插萸未赋王摩诘，览镜徒嗟顾恺之。
万里喜传征雁信，三朝遥献梦熊诗。
君看蜡炬应垂泪，肠断巴山别有思。

偕诸友游乾城九师，寄怀王啸苏老师

一九四五年

天时人事日相催，乘兴登临倦眼开。
坂历王尊嗟九折①，堂铭苏轼感三槐。
经冬霜叶昏连晓，对语山禽去复来。
莫话沅溪吴处士②，千年教泽足低徊。

注：①啸苏老师曾游九师有“石磴陵陀未易行”之句。

②乾城九师，即明代吴处士鹤讲学之所，处士为王阳明门人。

附录 卿生石麟有游九师寄怀之作，乞余答和，因赋此什，并示杨（人钧），魏（寅）二生。 长沙 王啸苏

密雨彤云逼仲冬，殷殷数子日相从。
闲时访古寻残碣，暗室论文听暮钟。
求友已闻枝上鸟，攀条犹忆岭头松①。
延宁旧教今应在，好向阳明溯正宗。

注：①予游九师，曾于林下小息。

辰阳旅邸，寄怀贺立秋同学乾城 一九四五年

风雨飘摇恨未纾，更闻驱曲促征车。
千山红叶离人泪，半郭青烟隐士居。
梅鹤林逋君乐此，莼鲈张翰我归欤。
羁怀旅邸时惆怅，况复天涯又岁除。

所里留别南岳商专诸友五首 一九四六年

回首衡山负笈时，磨穿铁砚各相期。
风回九曲湘流远，雨变千峰岳色奇。
剪烛西窗寻旧梦，飞觞东壁赋新诗。
嬉堂燕雀焉知祸，可奈星沙敌骑驰。

飘零身世百忧煎，况值中原浩劫年。
一片狼烟悲故国，五更鸡火伴陈编。
关山迢递音书梗，台榭荒凉涕泪涟。
莫向黄庭寻旧梦①，春愁无限托啼鹃。

忽闻三岛树降幡，举国军民共得欢。
钟阜嵯峨犹虎踞，秦淮缭绕似龙盘。
欣看赤县开昌运，且喜黄炎复旧观。
恰是乱离欣再聚，眼看沅水意漫漫。

岳云湘水郁千堆，把袂长吟一啸开。
宁戚放歌常扣角，杜陵多病独登台。
阊阖尚有枯鱼感，槽枥谁怜伏骥才。
休向霸桥增慨叹，怕禁离绪强传怀。

连朝风雨倍伤神，柳暗长堤不算春。
芳草有情皆碍马，江波微涨欲生鳞。
阳关已赋王摩诘，狂客偏归贺季真。
此日送君犹有我，他年送我更何人。

注：①黄庭观名。

早行大洋江途中 一九四六年

朝去金溪万壑奇，扬鞭一骑任驱驰。
月含江影潮初涨，风撼松涛树欲移。
漫怯荒鸡惊晓梦，偶闻山鸟噪新枝。
物情自是陶然乐，谁解征夫怅别离。

寄怀颉犀照夫子 一九四六年

远别犀翁久，徬徨无所之。
雁书常不达，蝶梦独寻思。
老柏霜犹茂，寒梅雪更奇。
清操陶处士，安命乐奚疑。

寄怀游芳英郁中 一九四六年

风雨蓬庐百虑侵，放怀天地总忧深。
花经秋冷翻嫌瘦，蝉为愁多未肯吟。
圯志震川伤二二，相庄德曜印心心。
莫嗟时运终难转，衰极当知盛欲临。

谒锦泉弟新垅曾家岭 一九四六年

风雨梅村有所思，东台凭吊不胜悲。
垅头马鬣新黄土，镜里蛾眉旧素帷。
大梦百年先我觉，深情廿载痛谁知。
梅南何日联床语，把酒清宵共赋诗。

谒祖母曾老孺人圆珠岭新垅 一九四六年

东风吹我上圆珠，来展先莹泪眼枯。

烽烟四郊嗟馭鹤，恩情一表及私乌。
少持阆苑勤夙夕，老为闾门树楷模。
家祭者番何所告，池中新养四龙雏①。

注：①代指中奇、治平、俊湘等四曾孙。

登岳麓山

一九四六年

亭寻爱晚上层巅，石径陂陀翠接天。
云罨麓山深浅树，风分湘浦往来船。
孤城历劫哀辽鹤，荒冢留芳咽暮蝉。
欲讯山灵无限感，数峰寒带夕阳烟。

柳敏泉老师以尊甫伯謙公百岁冥誕命題喜賦奉呈

一九四六年

灵光鲁殿想巍峨，骚赋遗音继汨罗。
杏馆题诗邀月伴，蕉窗竞爽绍风和。
神州厌见沧桑变，佛国应知般若多。
家祭百年通臂咳，樽前快听颂平倭。

岁暮感怀

一九四六年

长途风雪感劳人，老我蓬庐一石麟。
芳草每萦池上梦，笔花难发案头春。
失时涸辙鱼犹困，得意营巢燕自辛。
归效莱衣承舞彩，筹添海屋祝灵椿。

春日谒王啸苏老师岳麓书院

一九四七年

东风吹绿满阶除，问字云亭溯古初。

难反三隅惭我拙，别经两月事公疏。
坪前桃李迎蝴蝶①，案上缣绡走蠹鱼。
山馆清吟消永昼，睡余扶倦几翻书。

注：①岳麓书院前有桃李坪。

春日谒柳敏泉老师岳麓书院半学斋 一九四七年

东南坛坫仰崔巍，和煦春风载酒来。
历劫几增辽鹤感，新诗偏受祖龙灾。
胸怀灵麓千峰秀，身寄清湘一水隈。
镇日藜床吟味好，门前桃李笑相陪。

附录 答赐生石麟见赠原韵 湘阴 柳敏泉

名山权借一枝栖，鸿爪难寻旧日泥。
却笑砚荒同笔秃，敢希玉躐与金题。
学虚胸次春冰涣，愁压眉尖云麓低。
讲舍荒凉毡亦冷，见贤犹自勉思齐。

奉和柳敏泉老师南社上巳雅集原韵 一九四七年

长沙倭骑踏成灰，谁向骚坛辟草莱。
世换沧桑辽鹤感，诗传梨枣祖龙灾。
倾觞欲吸湘流尽，研墨狂招岳雨来。
修楔兰亭余胜事，东风正遣杜鹃开。

立秋以悼方筱川校长诗相示，次韵志痛 一九四七年

夫子循循善诱人，每怀眉宇见丰神。
经传三字民争诵①，校辟双江事纪新。

老杜乱离常写愤，仲淹忧乐为斯民。
那堪杯酒临风莫，肠断花前杜宇春。

注：①公著有民众三字经。

附录

赠卿生石麟

平江 方筱川

常说登高必自卑，宋人助长抑何痴。
青松赤骥原佳种①，璞玉浑金有美姿。
励志莫忘观榜事，平心须念过桥时。
桃红李白三春景，老眼游看此最宜。

注：①予妙中《毕业自嘲》诗中有“青松真见千年节，赤骥非无万里姿”之句。

女定坤殇周年矣，偶一思之，百感交集，兹赋一律，聊

以志痛

一九四七年

百感锥心强自支，更阑塑坐哭吾儿。
不知墙角花移影，蓦觉床头月入帷。
汤沐三朝罹大劫①，痾沉十日误庸医。
哀思五内难抒写，络纬阶前似助悲。

注：①一九四五年四月，时值日寇进犯新化。

早发邵阳市

一九四七年

晓烟轻带万人家，四壁鼾声入耳哗。
鸡唱埭中惊月堕，虫吟篱畔觉寒加。
珠含细草摇清露，脂抹名花映彩霞。
笑我驰驱常客路，飚车今又向长沙。